

7 Julai 2012

Lima sindiket dadah tumpas

Oleh NORAZRIN MARZUKI
pengarang@utusan.com.my



NOOR Rashid Ibrahim menunjukkan senjata api yang dirampas pada sidang media di Ibu Pejabat Polis Bukit Aman, semalam.

KUALA LUMPUR 6 Julai - Polis Diraja Malaysia (PDRM) mencatatkan kejayaan besar dalam usaha membanteras kegiatan penyeludupan dadah di negara ini, apabila berjaya menumpaskan lima kumpulan sindiket pengedaran dadah antarabangsa dan merampas dadah bernilai lebih RM1 juta dalam tempoh tidak sampai seminggu.

Kejayaan itu adalah hasil tangkapan lima lelaki warga Afrika dan empat rakyat tempatan dalam lima serbuan berasingan bermula Isnin lalu sehingga semalam.

Dalam serbuan itu, polis bukan sahaja menemui dadah tetapi turut merampas sejumlah senjata api daripada sekumpulan pengedar dadah warga tempatan yang mempunyai rekod kesalahan lampau terlibat dalam kes samun.

Pengarah Jabatan Siasatan Jenayah Narkotik Ibu Pejabat Polis Bukit Aman, Datuk Noor Rashid Ibrahim berkata, sindiket mengedar dadah didalangi empat lelaki tempatan yang turut memiliki senjata api itu berjaya ditahan dalam serbuan di sebuah rumah di Ulu Gombak di sini pada pukul 2 petang semalam.

"Dalam serbuan itu, kita telah menangkap empat lelaki tempatan dan merampas dua pucuk pistol jenis Glock dan Smith & Wesson, dua pucuk pistol semi-automatik beserta magazin, 697 butir peluru pelbagai jenis dan 140 biji pil eramin 5.

"Seorang suspek yang ditangkap didapati memiliki tiga rekod kesalahan lampau termasuk kes samun berkawan dan dadah," katanya pada sidang akhbar di Ibu Pejabat Polis Bukit Aman di sini hari ini.

Noor Rashid berkata, keempat-empat lelaki yang ditangkap itu kini disiasat di bawah Seksyen 8 Akta Senjata Api (Penalti Lebih Berat) 1971 yang boleh dikenakan hukuman penjara sehingga 14 tahun dan tidak kurang enam sebatan jika disabitkan kesalahan.

Beliau berkata, pada pukul 8.30 malam hari sama, pihaknya turut berjaya memberkas seorang lelaki warga Nigeria bersama dadah jenis syabu seberat 500 gram yang disembunyikan dalam ruang khas beg yang dibawa di Lapangan Terbang Antarabangsa Kuala Lumpur (KLIA). Suspek baru tiba dengan penerbangan dari Kaherah, Mesir.

Katanya, sehari sebelum itu, polis dengan bantuan Malaysian Airport Berhad (MAB) telah menangkap dua lelaki warga Nigeria dalam serbuan berasingan di KLIA iaitu masing-masing pada pukul 8.35 malam dan 10.40 malam.